

中國方志叢書·華中地方·第八四九號

據

清·原步顏等修，袁章華等纂
清道光元年刊本

影印

江 西 省

崇仁縣志

(六)

成文出版社有限公司印行

中華民國七十八年三月臺一版

崇仁縣志

共六冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二一九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

崇仁縣志卷二十三

崇仁縣知縣原步顏修

藝文志 碑 敘 劄 書 跋 誄 詞 公牘 叙文章程附

孔子廟碑

元吳澄

夫學校之設三代至於今數千年矣所以明人倫而善風俗所以育人材而裨正教其關繫豈小哉而學之尊先聖也自漢以來未有一定之制亦未有通祀之典唐以聳動觀瞻振起儉惰居游於學之士於是警發而厚於倫可以端羣下之表儀而優於才可以待公上之選舉焉耳況崇仁近世先達

德行則有若尙書何公事業則有若僉書羅公博洽則有若
侍郎李公奧學則有四吳清節則有二謝皆後來之所當希
慕者進而有聞乎孔道則又有光於前夫如是庶幾不負邑
宰作興期望之心邑之士其可不勉哉

顯應廟冲惠侯故漢樂君碑

虞集

崇仁縣治南望七十里有山焉廣大高厚巖然其前其巔峻
而竝銳能出雲雨蓄神明凡水旱災害之禱無不通焉蓋邑
之望而吏民之所依也謂之巴山後易稱相山巴山者相傳
云東漢尙書樂巴字叔元魏郡內黃人而神仙傳云蜀成都

人史稱巴好道順帝時給事掖庭仕至黃門令性質直學覽
經典雖在中禁不與諸常侍交擢拜郎中遷桂陽太守始爲
桂人定婚姻喪祀之禮興立學校以獎進之雖幹吏卑末皆
課令習讀程試殿最隨能陞授七年乞骸骨用李固薦拜議
郎守光祿大夫與杜喬周舉等八人巡行州郡巴使徐州還
遷豫章太守郡闕多山川鬼怪細民嘗破貲產以祈禱巴素
有道術能役鬼神乃悉毀壞旁祀翦理姦巫於是妖異自消
百姓始頗爲懼終皆安之是時方分豫章郡東地置臨汝縣
則今撫州之境也而相傳以爲巴治妖民嘗至此故民間思

之不忘以巴之名名茲山云其後嘗置巴山郡在縣西南四十里遺跡猶有可考而縣西門曰巴陵門巴山至縣所從入也則山果以巴得名久矣巴後遷浦相徵拜尙書順帝之葬有司多燬民間墓巴上書切責禁錮還家二十餘年用竇武陳蕃薦拜議郎蕃武之禍以黨謫爲永昌太守辭病不行上書理蕃武寃下廷尉自殺而相傳巴有墓在山下而立祠焉今爲廣敎僧寺而山巔併記南昌尉梅子真與叔元而唐鄧葉二道士配之蓋出近世云故宋紹興二十六年有宣敎郎知縣事鄭圃孫懋爲令以告民曰周人以諱事神而名不以

山川名山曰巴懼民久以爲未安也洞庭有山以洞庭君之所居而謂之君山欒君自豫章爲沛相獨不可謂之相山乎乃酌酒以告神而神悅暴之於民而民從遂更名相山矣咸淳元年縣寓公朝奉大夫知邵武軍事闕得遇等言於朝曰縣有漢光祿大夫欒豫章之神祠墓在焉其神名在史冊守郡有功立朝有節訟陳實之寃竟以身殉風節凜然可以謂之神明者矣吏民祈禱必應而淫巫瞽史名稱鄙野非教民事神之道按祀典崇寧三年賜東明縣柏梁橋欒巴廟曰顯應廟大觀四年封巴爲冲惠侯顯應廟矣其山巔之祠與梅

子真同命得賜妙濟靈純真人之號者則用道家之言也樂
君生時靈異甚著人人能道之而斯邑之民有求輒禱有禱
輒應千百年以來殆不勝紀而圖志無古文字金石可徵考
而邑民飲食必祝則不誣也國朝大德丁未予畱斯邑是年
大旱八月且迎神至縣治大雨連夜嘗識其事於廟中已而
廟燬予文亡焉後三十四年爲至元庚辰之歲其旱尤甚苗
有未入土者民甚惶懼乃四月三日也承直郎達魯花赤鄆
城保童齋肅躬望遣其簿將仕佐郎豫章舒文琰疾馳詣廟
迎神像至縣以禱拜跪未終郊燎方熾而林風四起陰雲以

興簿至祠下悃悃之詞方申要迎之具未起震電已作於門
庶駿奔不及於猋馳保童率其屬奉迎於西郊祝史未及成
禮而沛澤滂沱衣冠盡濕隨至邑治雨連三日夜乃止四境
以沾足告大家細民具牲馘醪酒大享相繼神之冠服輿帳
旌旆煒煌一新不待勸而自至乃命典史豫章胡天祥伐石
於城北使教諭新城朱禮速予文以傳之予曰諾又使稅副
濟南魏淵奉神像還祠所過旄倪畱戀忻感淵乃周覽祠墓
之舊跡識山川之奇偉而歸告得神之情焉既而五月又不
雨遍禱羣望神在禱中是年會府及郡闕皆苦而縣自六月

三日雨十二日又雨而旬日之間雲雷常興四郊在望者或
十里或數十里或百里或一日或二日或一時隨地而足稽
諸旁近最爲沾渥焉是時保童悉力禱所以爲已任齋戒兼
旬而不閒嚴屠宰之禁厲不虔之俗家有疾苦而不顧身受
勞苦而不辭忠翊校尉縣丞縉山張榮與簿及典史實協心
焉必得雨而後止爲吏者其憂民如此其必有以鑒其誠者
乎天祥以石具告乃序其事而傳之爲迎享送神祠曰有敦
維崇其阻九陵時翕時舒與雲俱興降邱作神朱紱赤舄尙
書邦君司命司直自古在昔於我故懷我識其來嘗與雨偕

公宇斯穹私宇斯潔神君假思無怒伊悅高山峻嚴孚與禱
禋禴禋不違俯依我人我人何有有尊有俎黍稷既臯酒醴
維醕脾豚爲羞有炙有羹神來顧歆百物之精神昔故鄉父
老燕喜千載在斯不醉無起乃大乃神碩彥乃生爲嘉爲喬
爲棟爲楹爲美爲英寶藏興殖無有遠邇來被來澤仰其虛
矣穹窿休明就其奧矣流動滿盈時有序代神不可極曾孫
孫子有祀無斁

邑侯李公德政碑

明本省提學

夏寅

尹姓李氏名祥華亭人也舉丁丑進士來爲崇仁尹崇仁人

以久不得良尹奸民猾胥乘機起而擗毒諸生荒業而科舉
缺在官之百度無一治者於是拭目以觀尹之政也尹探其
故與吏民約法使棄前惡而新之不然者吾法不宥也民有
何某戴某者怙其富強而戴又善告訐皆不悛尹正其辜又
有鄒洪者誘惡少數寇劫鄉里尹悉逮戮之縣中肅然旣謁
孔子廟聽諸生講讀畢嘆曰是教化之本也退則需材修大
成殿及諸堂齋之就圯者簡邑中秀民併求草廬吳公邵庵
虞公子孫可教者親授經使爲文章又察民習之以富豪凌
貧弱也諷遣子弟一人入學然後召其人至縣庭禮貌之曰

是家今讀書習禮義者也由是富豪各懷惡不敢復無藉出
稅隱於大家而小民歲代輸官者亦以次清之大修黃洲橋
上施屋五十餘間始有病其費繁者尹曰愚民守成可耳安
足慮始哉及橋成民大便之置常平豫備倉五所各貯穀數
萬石成化初洊饑民得不困旱則躬禱羅山雨刻應九月間
勤勞清慎若出一日神壇公寓之起墜者甚衆余始巡崇仁
試諸生俱可觀問吳虞二公集則已捐俸鋟易纂言於板矣
尹時將滿考縣民數百輩訴欲畱之予歸問寮友閒僉曰果
賢尹也而縣父老亦數數訴於藩臬今年上以青故遣大臣

分視四方西江得大理卿夏公予首以尹爲言公慨然具疏
旌之未報而尹滿考去矣予以鄉舉行復試士崇仁得三十
餘員視他邑獨盛皆尹所造也縣丞趙文典史童貴學官諸
倫楊文璿蔣宗文輩謀書尹績於石而以告予予職雖文事
方惡世之狀功美德滔滔焉淪於無稽而不忤也忍效其爲
乎然尹之事實錄也縱予亦無稽而不忤者以厚誣後世有
縣學佐官諸生在以爲有是乎無也無則曷靳一言以沒尹
之賢乎且旣不能慰崇仁之民之畱而又不以慰崇仁之民
之思乎故記而歸諸縣官俾刻石於學以表尹之績於興學

尤多云

邑侯黃公去思碑

明王淮

令去民最近政化所及最速而最難得者民之心民愚而神視其所趨政善則懷乖則懟或問楊子爲政有幾曰思無斁以周公齊桓爲明徵焉是爲治者顧感之何如而民心之公是非自不可掩果終難得者哉莆陽壺淙黃公嘉靖乙未冬以銓部薦起奉聖天子簡命來牧吾崇三載考績將如京師先期聞太恭人林氏訃乃終制焉庠生黃幟程錄熊翰耆老楊忠獻章時英黃介夫輩皆曰吾侯誠良師帥也不忍其去

雖去而不忍忘之也願爲立碑題曰去思託淮文之以紀其
政黃公何以得此於民耶蓋其漸以家學之淵源繼承甘泉
先生體認天性之訓德性純茂踐履篤實所養者正矣及發
軔賢科秉麾下邑凡所經綸以絕壑烈火爲鄙而欲陶之以
春風和氣正道自持脂膏下潤以無事處事勿御能勿矯名
每涖公堂戴星出入受詞審鞠立辨疑枉崇冊籍多弊公稽
丁力清飛糧吏胥無所售其奸嘗值旱甚躬禱於山川冒暑
熱斥張蓋引咎自責得大雨如澍且加意人材創號舍以居
之修復黃洲橋所費則召僧勸義不强其所不欲是故吾民

見其寬而不苛也謂足以若其生見其正而不阿也謂足以彰其軌見其清而不污也謂足以裕其私見其利而不鑿也謂足以游其大見其勞身以爲民也謂足以憂其憂冊籍正而徭役均民困以之舒學校興而教化明民風以之淳橋梁成而胥溺遠民患以之 政化及民若此尙安忍其去耶雖去而寧忍忘之耶此去思碑之所以立也抑以風乎後之來牧茲土者公固不屑於此然吾民不容已之情欲辭之不可得也視其思可以知其政視其政可以占其人古之爲治者衆矣其得之於民有生而祠之者有曰賊來尙可尹來殺我